

蘇文擢著

孟子要略

文擢



靈芬聯集

一九八九年十月

韋基可醫生

陳希夷心相篇述疏

一九八九年十二月

及門鄭麗霞女士

宮教集

先祖父簡園公 一九八一年三月

伍絜宜先生

冬心室學駢體文

先考冬心公 同上

同上

太平洋會議前後中國外交內幕與梁士詒之關係

審訂 一九七〇年十月

梁譚玉櫻所藏書翰圖照影存

編纂

一九八六年七月

順德梁鈺琚圖書館惠存

邑人蘇文擢敬贈
辛未重九



哲人既萎亞聖斯
作距詖闢邪正論
謬謬堯舜之性仁
義之學烈日秋霜
泰山喬岳

錄明陳鳳梧

孟子贊

辛未元日蘇文擢

序

蘇文擢

一九六〇年間，予以四書講說於孔聖堂。大學中庸論語。皆循章句陳說。斟酌於訓詁義理史例之間。次及孟子。私欲一變其講論方法。稿略擬定。而講座以他事中輟。草稿存敗簏中。頃重行檢視。不忍委棄。乃略加整補。名曰孟子要略。其言皆平易淺近。於開學養正。扶樹教道。庶有裨補。

晚近侮聖言者無論矣。其言經籍者。又以述古爲陳腐。務創獲爲新奇。不知聖人之道。如日月常在。光景常新。如布帛菽粟。無所往而不切於時用。顧在學者深思篤信而力行之耳。以予所見聞。三四年間。以孟子成書。出於眞學眞受者。時或遇之。乃若如朱子所云讀經而爲經賊。固亦有焉。鉤析於文字語法之間。而質疑於千百年之上。甚者以義利之辨爲爽於時用。以五倫流毒中國。孟子宜負其咎。雖有民貴之說。不可能有民主之政。較之古人刺孟疑孟刪孟。彌近理而大亂眞。所謂愈學而愈愚者也。

方今聖道榛蕪。人德不立。孟子所謂人之異於禽獸者。日壞爛而不收。邪說生於一念之微。而貽誤於政教之大。居常展誦七篇。深覺二千年前。孟子所大聲疾呼。提撕警覺者。至今而愈形其逼切。異時海宇一平。當重爲振興中華文教之用。要略原爲講座中提挈綱目。詞義必於至常至正。所謂同乎舊談。理不可易。故簡鍊而有待發揮。若必引而申之。更僕有不能盡。學者果能於七篇章句。循序而口誦心維。則茲篇視爲糟粕焉可也。一九九一年歲在辛未仲春蘇文擢。

孟子要略目錄

第一章	孟子傳略	一
第二章	孟子七篇	一五
甲	孟子篇數	一五
乙	七篇作者	一七
丙	孟子稱經	二〇
丁	孟子註釋	二三
第三章	孟子時代背景	二八
甲	政治	二八
乙	經濟	二九
丙	學術思想	三一
丁	社會道德	三三
第四章	孔孟持論之異	三七
	事君	
	性善	
	攻異端	
	教育法	

第五章 孟子要義……………四七

甲 七篇章旨……………四七

乙 性善……………五一

丙 仁政……………六一

丁 善教……………六五

戊 道德 仁孝 知言養氣 尙志尙友 自反 義利之辨……………七三

己 民貴君輕與貴王賤霸……………九八

第六章 孟子好辯 楊朱 墨翟 許行 陳仲子 公孫衍

張儀 鄉愿……………一〇三

第七章 孟子之影響及批評……………一一四

附錄 趙 岐 孟子題辭……………一二九

孫 奭 孟子正義序……………一三三

朱 熹 孟子集義序……………一三五

張 栻	孟子說序……………	一三八
蘇文擢	尊孟與讀孟講辭……………	一四〇
蘇文擢	孟子學說的三大要點講辭……………	一五一

第一章 孟子傳略

孟子生平始見於司馬遷史記。然略而不詳。

司馬遷史記孟子荀卿列傳：孟軻。鄒人也。受業子思之門人。道既通。游事齊宣王。宣王不能用。適梁。梁惠王不果其言。則見以爲迂遠而闊於事情。當是之時。秦用商君。富國強兵。楚魏用吳起。大戰勝弱敵。齊威王。宣王用孫子。田忌之徒。而諸侯東面朝齊。天下方務於合縱連衡。以攻伐爲賢。而孟軻乃述唐虞三代之德。是以所如者不合。退而與萬章之徒序詩書。述仲尼之意。作孟子七篇。明薛應旂四書人物攷又擇焉未精。

明薛應旂著四書人物攷。四庫提要已譏其多採雜說。孟子傳尤多採自孔叢子。然孔叢子晚出不可盡據。明宋濂諸子辯。清姚際恆古今僞書攷。明胡應麟四部正譌。近人梁啟超古書眞僞及其年代攷均有致疑。然薛氏於自序中已云汎引雜證。不敢過求其眞贗也。

近人羅根澤孟子傳略後出。考訂謹嚴。亟宜參考。惜其立說不標出

處。讀者易滋疑惑。

羅書出於民國十七年。其自序云：於其出處行歷。依據孟子。參以諸儒之考證。信而有徵者書之。荒謬懷疑者不錄。

茲鈎稽衆說。爲傳略如左。

孟子名軻。鄒人。

漢趙岐孟子題辭：鄒本春秋邾子之國。孟子時改曰鄒矣。國近魯。後爲魯所并。今鄒縣是也。

宋朱熹孟子集註：孟子騶人也。騶亦作鄒。本邾國也。（邾即今山東鄒縣）邾鄒蓋一音之轉。

魯公族孟孫氏之後。

明凌迪知古今萬姓統譜：孟氏。魯桓公慶父之後。號孟孫。因氏。趙岐孟子題辭：或曰。孟子。魯公族孟孫之後。故孟子仕於齊。喪母而歸葬於魯也。三桓子孫。旣以衰微。分適他國。按趙云或曰。尚有存疑。焦循於趙岐題辭正義列舉孟氏有孟公綽。孟之反。南宮敬叔。及其先世孟獻子。孟莊子。皆爲孔子所稱。而僖子。懿子。

武伯。皆知敬孔子。而孟敬子又爲曾子門人。而孟子又受業於子思之門人。則孟子宗師仲尼。其來有自。宜爲孟孫之後矣。據顧棟高春秋大事表公卿世系表列孟子之先世如後。

魯桓公——慶父——孟穆伯——孟文伯——孟獻子——孟莊子——孟孝伯

(公孫敖) (穀) (仲孫蔑) (仲孫束) (仲孫羯)

南宮敬叔

(仲孫閱)

孟僖子

(仲孫纘)

孟懿子——孟武伯——孟敬子

(仲孫何忌) (仲孫臯) (仲孫捷)

生於周烈王四年(前三七二)。去孔子之卒(前四七九)一百零二年。盡心章下云：「由孔子以來。至於今。百有餘歲。去聖人之世。若此其未遠」者是也。

孟子生卒年月。史傳不載。後世聚訟紛紜。元程復心孟子年譜及清

狄子奇孟子編年皆謂孟子生於周烈王四年。論者多從之。羅根澤孟子傳論羅列古今七說。而綜言之曰。無古證。終屬臆測。確定年月。實不可能。今世以四月初二日爲孟子誕辰者。則明陳士元孟氏譜之說也。

幼受慈母之教。

劉向列女傳母儀：鄒孟軻之母號孟母。其舍近墓。孟子之少也。嬉戲爲墓間事。踴躍築埋。母曰。此非所以居子也。乃去舍市傍。其嬉戲爲賈人街賣之事。孟母又曰。此非所以居子也。復徙舍學宮之旁。其嬉遊乃設俎豆揖讓進退。孟母曰。眞可以居吾子矣。遂居之。

又：孟子稍長。就學而歸。母方織。問曰。學何所至矣。軻曰。自若也。母以刀斷織。軻懼問其故。孟母曰。子之廢學。若吾斷斯織也。……軻懼。旦夕勤學不息。

韓詩外傳九：孟子妻獨居。踞。孟子入戶。視之。白其母曰。婦無禮。請去之。母曰。何也。曰。踞。母曰。何知之。曰。我親見

之。母曰。乃汝無禮也。非婦無禮。禮不云乎。將入門。問孰存。將上堂。聲必揚。將入戶。視必下。不掩人不備也。今汝往燕私之處。入戶不有聲。令人踞而視之。是汝之無禮。非婦無禮也。於是孟子自責。不敢去婦。

長受業於子思之門人。

趙岐題辭：長師孔子之孫子思。

司馬遷史記：孟軻受業於子思之門人。

按孟子受業於子思抑子思門人。後學議論紛如。大抵漢唐舊說。皆謂受業子思。如劉向列女傳云：師事子思。漢書藝文志云：孟軻。子思弟子。孔叢子雜訓云：孟子車請見。子思甚悅其志。應劭風俗通窮通篇云：軻受業於子思。唐李翱復性書亦云：子思仲尼之孫。得其祖之道。述中庸四十七篇以傳於孟軻。史記索隱引王劭謂：受業於子思之門人。人字衍文。蓋以史記爲誤。然自明焦竑筆乘卷三有孟子非受業子思專條云：史記載孟子受業子思之門人。不察者遂以爲親受業於子思。非也。考之孔子二十生伯魚。伯魚先孔子五年

卒。孔子之卒。敬王四十一年。子思實爲喪主。子思生年不可知。然孔子之卒。子思則既長矣。孟子……何得及子思之門。相爲授受哉。至清崔述孟子事實錄卷上辨之尤詳。孔子之卒。下至孟子遊齊。時一百六十六年。伯魚之卒在顏淵前（先孔子五年）。則孔子卒時。子思當不下十歲。孟子在齊時。不過六十歲。即令子思享年八十。距孟子之生尙三十餘年。孟子何由受業於子思乎。孟子云。予未得爲孔子徒也。予私淑諸人也。若親受業於子思。則當明言其人。以見傳之有自。何得但云人而已乎。由此言之。孟子必無受業於子思之事。史記之言是也。

治儒術之道。習孔氏之書。尤長於詩書。

趙岐題辭：治儒術之道。通五經。尤長於詩書。

清顧炎武日知錄：孟子書引孔子之言凡二十有九。其載於論語者八。（學不厭。教不倦。里仁爲美。君薨聽於冢宰。大哉。堯之爲君。小子鳴鼓而攻之。吾黨之士狂簡。鄉愿德之賊。惡似是而非者。）又大同而小異。

公孫丑上動心章：乃所願。則學孔子也。

盡心下：由孔子而來。至於今百有餘歲。去聖人之世。若此其未遠也。近聖人之居。若此其甚也。然而無有乎爾。則亦無有乎爾。陳澧東塾讀書記卷三：孟子引詩者三十。論詩者四。引書者十八。論書者一。又有似引書而不言書曰者。所謂尤長於詩書。於此可以窺見矣。按原文並列舉所引詩書句。可檢索。其時列國爭強。各相侵伐。詐僞並起。生民塗炭。

班固漢書藝文志：仲尼沒而微言絕。七十子喪而大義乖。

趙岐題辭：周衰之末。戰國縱橫。用兵爭強。以相侵奪。當世取士。務先權謀。以爲上賢。先王大道。陵遲隳廢。異端並起。若楊朱墨翟放蕩之言。以干時惑衆者非一。

劉向校戰國策書錄：仲尼既沒之後。田氏取齊。六卿分晉。道德大廢。上下失序……晚世益甚。萬乘之國七。千乘之國五。敵侔爭權。蓋爲戰國爭強。勝者爲右。兵革不休。詐僞並起。當此之時。雖有道德。不得施謀。

離婁上：爭地以戰。殺人盈野。爭城以戰。殺人盈城。此之謂率土地而食人肉。

滕文公下：庖有肥肉。廄有肥馬。民有飢色。野有餓殍。此率獸而食人也。

公孫丑上：民之憔悴於虐政。未有甚於此時者也。

滕文公下：聖王不作。諸侯放恣。處士橫議。楊朱墨翟之言盈天下……世衰道微。邪說暴行有作。臣弑其君者有之。子弑其父者有之。

閔堯舜禹湯文武周孔之道將遂湮微。而又傷乎異端惑世。於是則慕仲尼。轍迹周游。以儒道說諸侯。欲救民水火。平治天下。

滕文公下：孔子之道不著。是邪說誣民。充塞仁義也。仁義充塞。則率獸食人。人將相食。吾爲此懼。閑先聖之道。距楊墨。放淫辭。……我亦欲正人心。息邪說。距詖行。放淫辭。以承三聖者。豈好辯哉。予不得已也。

公孫丑下：王如用予。則豈徒齊民安。天下之民舉安。